



Sud Bosne i Hercegovine
Sud Bosne i Hecegovine

Broj: S1 3 Iž 037144 20 Iž
Sarajevo, 09.10.2020.godine

Sud Bosne i Hercegovine, u drugostepenom vijeću sastavljenom od sudija Zvezdane Antonović, kao predsjednika vijeća, Mirsade Džindo i Vesne Trifunović kao članova vijeća, odlučujući o žalbi Babić Dragana, Selska ulica broj 60, Nart Savski, Rugvica 10370, Republika Hrvatska, izjavljenoj protiv Odluke CIK BiH broj 05-1-07-1-998/20 od 01.10.2020. godine, u nejavnoj sjednici, održanoj dana 09.10.2020. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine broj 05-1-07-1-998/20 od 01.10.2020. godine odbijen je upis u izvod iz Centralnog biračkog spiska za glasanje izvan BiH. Sastavni dio odluke je tabela sa sa imenima odbijenih birača za upis u izvod.

S obzirom da nije prihvaćena prijava za upis u izvod iz Centralnog biračkog spiska za glasanje izvan BiH, žalitelj je uložio žalbu navodeći da na označenoj adresi živi u velikoj porodičnoj kući te da nije bilo osnova da se njegova registracija odbije uz argumentaciju da na predmetnoj adresi živi više od 6 lica. Isitiče i da je na isti način glasao 2018. godine. Predlaže da se žalba uvaži kao osnovana.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana jer je osporavano rješenje opravdano doneseno kako bi spriječilo negativne posljedice koje bi eventualno nastupile dostavljanem glasačkog materijala za više lica na istu adresu. Odredbe člana 5.21 stav (1) Izbornog zakona BiH propisale su da Centralna izborna komisija utvrđuje način i proceduru glasanja građana BiH poštom pa je preispitujući žaliteljevu prijavu utvrdila da je za žalitelja i još 6 lica označena ista adresa za dostavljanje glasačkog materijala i da se radi o izbornom inženjeringu koji može uticati na izborni rezultat.

Ispitujući pobijanu odluku u okviru žalbenih navoda vijeće je zaključilo da je žalba neosnovana.

Prilikom utvrđivanja činjeničnog stanja Centralna izborna komisija BiH je, prema stanju u spisu, pravilno utvrdila da je označena adresa za prijem glasačkog materijala na prijavi, ista kako za žalioca tako i za još 6 lica, sa istom biračkom opcijom za sve prijave. Stoga je prema stanju u spisu, na osnovu potpuno utvrđenog činjeničnog stanja, izveden i pravilan zaključak da bi se dostavom osjetljivog izbornog materijala na istu adresu: Nart Savski, Rugvica, Selska ulica 60, Republika Hrvatska, povrijedilo osnovno izborno načelo, tajnost glasanja i izbora direktno od strane birača, koje garantuje odredba člana 1.3 Izbornog zakona BiH.

Ukazivanje žalitelja da sa svim prijavljenim licima živi na istoj adresi u velikoj porodičnoj kući, nema uticaja na odluku o žalbi, jer na ove okolnosti nije dostavio dokaze.

Nadalje, navodi žalitelja da je na Opštim izborima 2018. godine u istim okolnostima ostvario glasačko pravo nisu od značaja iz razloga jer odredba člana 3.15 stav 1. Izbornog zakona propisuje obavezu državljanina BiH koji privremeno živi u inostranstvu, da za svake izbore Centralnoj izornoj komisiji BiH podnose prijavu za upis u izvod iz Centralnog biračkog spisaka za glasanje van BiH. Predmetnom odlukom žalitelju nije uskraćeno biračko pravo jer se, shodno odredbi člana 3.16 stav 2 citiranog zakona, nalazi u izvodu iz Centralnog biračkog spiska za glasanje u osnovnoj izornoj jedinici u kojoj ima prebivalište u Bosni i Hercegovini.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA
SUDIJA
Zvezdana Antonović**